

(钦定)平定七省方略

北京中国书店印行



THE UNIVERSITY OF CHICAGO

THE UNIVERSITY OF CHICAGO

欽定勦平粵匪方略卷三百四十八 癸亥年

七月初二日 丙午 李鴻章奏冒蘇州踞賊以吳江

震澤縣城當江浙之衝爲嘉湖援賊所必由之路添聚逆黨分紮花涇港尉壘等處阻截官軍臣因商令程學啟戈登先圖吳江以斷賊援六月十一日程學啟督令陽利見等進攻花涇港賊壘該逆見我軍突至開礮迎擊程學啟等揮

兵堯勦以開花礮向賊營轟擊賊敗回壘中適
蘇州援賊數千由葑門出寶帶橋鼓譟而前令
礮船截擊之連放炸礮六十餘次轟倒石城四
垛壘賊驚亂戈登輪船隨到連開大礮悉中要
害程學啟督水陸將士一擁而出燒燬賊船二
十餘隻陣斬三四百名當將賊壘攻克吳江之
賊數千蠡擁又至經官軍追斬數百名十三日

進攻同里副將張光泰等將湖口賊營踏破生
擒五百餘名潰賊梟水逃遁官軍以槍礮排擊
轟斃溺斃之賊數千蘇州賊酋率二萬餘人礮
船一百餘隻由尹山橋圍攻花涇港石壘程學
啟親督水陸各軍往援分抄賊後復經副將劉
士奇等奮勇夾擊賊卽潰退同里賊營卽時攻
克李恆嵩度官軍攻勦同里之際城賊必不爲

備先將北門外賊卡踏毀並將同里回竄之賊
擒斬淨盡十四日程學啟督軍進偪城根合力
攻擊該逆自知不敵開門出降吳江震澤縣城
卽於辰刻收復臣查江震一城當吳越之衝水
陸交匯茲旣攻克則嘉湖賊援可斷且由花涇
港直下太湖足以規取蘇垣程學啟等奮勇當
先勦辦尙爲得手其尤爲出力之副將張光泰

等先行開列仰懇

恩施至陣亡把總劉士珂等並請

旨交部從優議卹

李鴻章又奏言丹陽江陰各逆首攻撲楊庫分

踞長涇經臣傳令各營分投勦洗初八日該逆

分數十股漸徧楊庫西南北三門忽自退去據

降卒云江陰無錫各僞王與護逆意見不合均

率衆回遁沙山僅護逆一股盤踞未退是夜唐
殿魁派勇偷擊賊館賊多憑河防守我勇由太
平橋繞襲其後擒斬多名焚燒賊卡二處賊竄
向黃塘而去初九日黃翼升進攻長涇踞賊連
踏卡壘十餘座賊退回竹塘青陽港李鶴章令
總兵郭松林等分出隊伍於顧山陳市嚴家橋
一帶排列長涇之賊時出衝突當經擊退嚴家

橋之賊亦經擊敗賊於七里橋設有大卡一座
我軍於初九日用槍礮排擊該逆拌命抵拒適
王東華督礮船前來併力攻擊轟倒卡牆數丈
我軍蠡擁而進該逆敗過浮橋斬殺無數賊衆
大敗狂奔自相踐踏死者尤多當將賊卡賊壘
一律踏平臣查楊庫長涇一帶竄賊經各營將
士冒暑擊退疫病甚多略一休息應卽相機進

圖江陰已函商黃翼升並令劉銘傳李鶴章等
穩慎籌辦其力戰陣亡之千總唐先蔭並其兄
唐先照應請

旨飭部分別議卹以慰忠魂

李鴻章又奏言據常熟巡船在潯關奪獲僞文
數百件臣查閱多係金陵賊目致蘇杭嘉興各
頭目書信內稱洪逆現封僞忠王李秀城爲軍

師留守金陵因被官軍圍逼調各僞王赴援並
求蘇嘉各賊解濟米糧該城內米價每石十二
兩無處購買火藥亦缺等語臣查九洑洲下關
克復則江路已斷商舶不能販運進城金陵賊
衆糧少實有坐困之勢曾國荃鮑超漸圍漸緊
可冀得手現在蘇州賊勢亦蹙吳江復後我軍
進步較寬臣已商令戈登程學啟等密爲防備

通飭前路營卡一體查拏嚴斷接濟以杜狡謀
奏八

上命議政王軍機大臣傳諭李鴻章曰江震一城當
水陸之衝恐嘉湖之賊必將力爭要隘我軍旣已
攻克必須固守方足以扼賊吭而制其命著李鴻
章飭令程學啟等仍以穩紮穩進爲主然後由花
涇港直下太湖規取蘇城毋稍大意楊庫長涇之

賊旣經擊退卽應飛飭各營進規江陰惟該營將士冒暑征戰疫病甚多殊深廕念該撫當令黃翼升等妥爲拊循入秋以後疫氣定可漸平卽督令該員弁等妥籌進取無誤事機計關搜獲僞文內稱金陵城內米價昂貴火藥亦缺並調各僞王赴援等情著卽飛咨曾國荃上緊偪攻並嚴斷接濟以期早克堅城現在江南各軍以次得手該撫惟

當督飭各軍謀定後動先自立於不敗之地以待敵之可勝然後攻瑕乘隙自不難節節蕩平同膺懋賞勉之望之

上諭內閣曰此次官軍攻克花涇港同里賊壘收復吳江震澤縣城仍著李鴻章督飭諸軍進逼蘇州省城嚴密布置以期及早攻拔迅掃妖氛李鴻章自駐軍上海節節進剿疊克崑新常昭等城復克

吳江震澤調度有方深堪嘉尙著交部從優議敘
其尤爲出力之副將張光泰陳東友成俞卿均著
以總兵記名簡放總兵陽利見陳有昇副將劉士
奇均著遇有總兵缺出儘先提奏陽利見劉士奇
並賞給二品封典副將張元龍著賞給彪勇巴圖
魯名號何安泰著賞給挺勇巴圖魯名號王永勝
著賞給慤勇巴圖魯名號參將陳忠德著以副將

推補遊擊阮炳福著以參將補用並賞加副將銜
光祿寺署正徐佩瑛著免選本班以知州儘先選
用並賞加運同銜守備鄭國榜著以都司補用並
賞換花翎千總謝梁鎮著以守備補用並賞加都
司銜以示獎勵陣亡把總劉士珂外委周長榮張
萬盛均著交部從優議卹其餘應獎應卹人員著
李鴻章彙案具奏丹陽江陰各逆首攻撲楊厘分

踞長涇經劉銘傳等水陸擊勦賊卽潰竄所有陣
亡千總唐先蔭著照陣亡例從優議卹把總唐先
照著照軍營病故例議卹

初三日 丁未 馮子材魁玉奏言南路援賊自常州

至丹陽蟻聚十餘萬衆其丹陽境內舊有逆卡
如博洛村水湖等處深溝高壘悉力負隅六月
初十日總兵田宗揚等督隊進勦水湖逆壘我